

Umsögn um drög að reglugerð um hrognkelsaveiðar 2020

Skýrsla vinnuhóps sjávarútvegs- og landbúnaðarráðherra sem birt er til kynningar og er falið að koma með tillögur um hvernig hægt væri að draga úr meðafla við grásleppuveiðar er kannski tæknilega rétt í sumum tilvikum.

Aftur á móti verða þær tillögur til þess að mjög óhagstætt verður að stunda þessa veiðar og mun ásókn í þær minnka sem ekki er gott fyrir sjómenn og byggðir í kringum landið og þjóðarbúið allt, mega því þessi drög ekki verða að veruleika. Það hefði verið rétt að láta þennan sama vinnuhóp einnig gera skýrslu hvort ekki sé réttast að setja grásleppu í aflamark eins og aðrar tegundir.

Við grásleppuveiðimenn eru búnir að pissa í okkar eigin skó með því að ganga ekki um auðlindina eins og okkur ber, það hefur sýnt sig og það vitum við allir og ættum að viðurkenna frekar en að finna einhverja aðra til að kenna um hvernig málin eru í dag. Ég tek það fram að ekki er um alla grásleppuveiðimenn að ræða því all flestir stunda veiðarnar á ábyrgan hátt. Fram hefur komið í fyrri skoðunarkönnun sem gerð var hér á samráðsgátt að um helmingur þeirra sem stunda veiðar á grásleppu vill kvótasetningu og ætti eins að hlusta á þeirra raddir eins og þeirra sem vilja halda áfram sömu vegferð með íþyngjandi reglum, reglugerðum og takmörkum sem ekki er hægt að fara eftir og skapar óhemju kostnaðarsamt eftirlit með kærnum og óánægju, engum til framdráttar.

Það er mín skoðun að það eigi að gilda sömu reglur um veiðar á grásleppu eins og öðrum fisktegundum, þú ræðst ekki á net eða línu eða gerir út á annan veiðiskap án þess að hafa aflamark á skipinu fyrir þeim afla sem þú færð í veiðafærið fyrir því eru lög. Það er ekkert flóknara fyrir okkur sem veiðum grásleppu að leigja til okkar aflaheimildir sem til þarf til að uppfylla þau skilyrði frekar en þá sem stunda aðrar veiðar. Margir og allflestir sem stunda veiðarnar fá úthlutaðan byggðakvóta einnig hafa margir þeir selt frá sér aflaheimildir og ættu því að hafa til þess forsendur.

Meðafla og brotkast myndi minnka til muna við kvótasetningu og þau rök sem ég hef fyrir því er að þá geta menn tekið upp net þegar illa árar í veðri og óhagstæðan meðafla, og geta hagað sínum veiðum á sem ábyrgastan hátt án þess að verða skertir um daga og þurfi því ekki að brjóta lög.

Enn er til þekking til að stunda þessar veiðar og ættum við að varðveita þá þekkingu en tryggja að hægt sé að stunda veiðarnar á hagkvæman og ábyrgan hátt en ekki eins og nú er eða eins og drögin leggja til. Menn hafa haft áhyggjur á samþjöppun með kvótasetningu, ég blæs á þær áhyggjur, alveg eins má kalla það samþjöppun í núverandi kerfi þar sem hægt er að eiga eins mörg leyfi og hægt er og krafa er nú um sameiningu leyfa. Þegar þú veist hvaða afla þú mátt veiða þá býrðu til mestu verðmætin. Með kvótasetningu gætu menn stundað veiðarnar eins og gert er á þorskanetum þar sem menn sníða sér stakk eftir vexti og eru með þann netafjölda (**með takmörkunum þó**) sem þörf er á miðað við sitt aflamark og mun því netum fækka í heild í sjó miðað við það sem nú er. Einnig mun það koma í veg fyrir að menn leggi net fyrir brjálaða brælu til þess að nýta alla dagana í einhverju kapphlaupi eða geta alls ekki tekið þau upp vegna skerðingu daga.

Ég skora því á sjávarútvegs- og landbúnaðarráðherra að leggja þessi drög til hliðar og setja grásleppu í aflamark því aldrei mun skapast friður um þessar veiðar ef það er ekki gert, bæði frá hlið veiðimanna og umhverfissinna sem hamast við að stoppa þessar veiðar eins og þær eru stundaðar í dag. Ég vil líka benda á að við kvótasetningu er hægt að hafa landið áfram svæðaskipt, tiltekinn byrjunartíma á hverju svæði, lengd veiðitímabils og hámarks netafjölda.

Bestu kveðjur,

Einar E. Sigurðsson Raufarhöfn

(Undirritaður hefur stundað grásleppuveiðar frá 1988)